

四庫全書

集部

欽定四庫全書

石倉歷代詩選卷六

明 曹學佺 編

齊詩

武帝

估客樂

昔經樊鄧役阻潮梅根渚感憶追往事意滿辭不叙

竟陵王子良

九月侍宴

月殿風轉層臺氣寒高雲斂色遙露已團式詔司警言  
戾秋巒輕觴時薦落英可餐

登山望雷居士精舍同沈右衛過劉先生墓下

作

沛國劉子珪學優未仕跡邇心遐履信體仁古之遺  
德潛舟迅景滅賞淪輝言念芳猷式懷嗟述屬舍弟  
隨郡有示來篇彌綰久要之情益深宿草之嘆升望

西山率爾為谷雖因事雷生實申悲劉子云爾

漢陵淹館蕪晉殄洙風缺五都聲論空三河文義絕興  
禮邁前英談玄踰往哲明情日夜深徽音歲時滅垣井  
總已平煙雲從容齋爾歎牛山悲我悼驚川逝

王融

淶水曲

湛露改寒司交鶯變春旭瓊樹落晨紅瑤塘水初淶日  
霽沙澈明風泉動華燭遵渚泛蘭觴乘漪弄清曲斗酒

千金輕寸陰百年促何用盡歡娛王度式如玉

採菱曲

炎光銷玉殿涼風吹鳳樓雕輜僚平隰朱櫂泊安流金  
華妝翠羽鷁首畫飛舟荆姬採菱曲越女江南謳騰聲  
翻葉靜發響谷雲浮良時時一遇佳人難再求

青青河畔草

容容寒煙起翹翹望行子行子殊未歸寤寐君容輝夜  
中心愛促覺後阻河曲河曲萬里餘情交襟袖踈珠露

春華返璿霜秋照晚入室怨蛾眉情歸為誰婉

同沈右率諸公賦鼓吹曲二首

巫山高

想像巫山高薄暮陽臺曲煙霞乍舒卷蘅芳自斷續彼  
美如可期寤言紛在矚憮然坐相思秋風下庭綠

芳樹

相望早秋日煙華雜如霧復此佳麗人含情結芳樹綺  
羅已自憐暄風多有趣去來徘徊者佳人不可遇

臨高臺

遊人欲騁望積步上高臺井蓮當夏吐窗桂逐秋開花  
飛低不入鳥散遠時來還看雲棟影含月共徘徊

從武帝琅邪城講武應詔

治兵聞魯策訓旅見周篇教民良不棄任智理恒全  
白日映丹羽頽霞文翠旂凌山炫組甲帶水被戈船  
凝霞鬱摧愴清管乍聯綿早逢文化洽復屬武功宣  
願陪王鑾右一舉掃燕然

棲玄寺聽講畢遊邱園七韻應司徒教

道勝業茲遠心閒地能隙桂棹鬱初栽蘭墀坦將闢  
虛檐對長嶼高軒臨廣液芳草列成行嘉樹紛如積  
流風轉還逕清煙泛喬石日汨山照紅松映水華碧  
暢哉人外賞遲遲眷西夕

蕭諮議西上夜集

徘徊將所愛惜別在河梁衿袖三春隔江山千里長  
寸心無遠近邊地有風霜勉哉勤歲暮敬矣事容光  
山中



殊未憚杜若空自芳

別王丞僧孺

首夏實清和餘春滿郊甸花樹雜為錦心池皎如練如  
何於此時別離言與宴留雜已鬱紆行舟亦遙衍非君  
不見思所悲思不見

寒晚敬和何徵君點

踈酌候冬序閒琴改秋律如何將暮天復值西歸日搖  
落迎軒牖飛鳴亂繩華煙灌共深陰風篴兩蕭瑟虛堂

無笑語懷君首如疾早輕北山賦晚愛東臯逸上德可

潤身下澤有徐轡

叶音必

和王友德元古意二首

遊禽暮知返行人獨未歸坐銷芳草氣空度明月輝  
嘯容入朝鏡思淚點春衣巫山彩雲沒淇上綠楊稀  
待君竟不至秋雁雙雙飛

霜氣下盟津秋風度函谷念君淒以寒當軒卷羅縠  
纖手廢裁縫曲鬢罷膏沐千里不相聞寸心鬱氤氲  
況復

飛螢夜木葉亂紛紛

遊仙詩

獻歲和風起日出東南隅  
鳳旂亂煙道龍駕溢雲區  
結賞自員嶠移讌乃方壺  
金卮浮水翠玉笋挹泉珠  
徒用霜露改終然天地俱

命駕瑤池隈過息羸女臺  
長袖何靡靡簫管清且哀  
壁門涼月舉珠殿秋風迴  
清鳥驚高羽王母停玉杯  
舉手暫為別千年將復來

湘沅有蘭芷汨吾欲南征遺珮出長浦舉袂望增城朱  
霞拂綺樹白雲照金楹五芝多秀色八桂常冬榮弭節  
且夷與參差聞鳳笙

淨行詩

韞石諒非真飾瓶信為假竊服臯門上濫吹溜軒下鳳  
祀徒驚心騶文終好野實相豈或照浮榮未能捨迹殊  
冠冕客事襲驅馳者已矣歇鄭聲無然亂周雅

處塵貴不染被褐重懷珠美玉曜幽石曾蘭挺叢芻四

氏不為侶三界豈能渝諒茲親愛染寧以財利拘煩流  
捨智寶榛路坦夷途萬物竟何匹烈火樹紅芙

心怨動紛繞情怡輒遷互歡愛一離遠傷憂坐衰暮連  
幌結清陰高臺起風露腐毒緣芳旨天伐實修嫵慾網  
必虧生繁置或全免耿耿夜何期悠悠終肯悟

春遊迴文詩

枝分柳塞北葉暗榆關東垂條逐絮轉落蘂散花叢池  
蓮照曉月慢錦拂朝風低吹雜綸羽薄粉艷妝紅離情

隔遠道歎結深閨中

侍遊方山應詔

巡躅望登年  
帳飲臨秋縣  
日羽鏡霜淥  
雲旗落風甸  
四瀛良在目  
八寓婉如見  
小臣竊自嘉  
預奉柏梁讌

和南海王殿下詠秋胡妻七首

日月共為照  
松筠俱以貞  
佩紛甘自遠  
結鏡待君明  
且協金蘭好  
方愉琴瑟情  
佳人忽千里  
幽閨積思生

景落中軒坐  
悠悠望城闕  
高樹升夕煙  
層樓滿初月光

陰非或異山川屢難越輟泣揜鉛姿搔首亂雲髮

傾魄屬徂火搖念待方秋涼氣承宇結明熠僚堦流三星亦虛映四屋慘多愁思君如萱草一見乃忘憂

杆軸鬱不諧契濶彌新故朔風櫺上發寒鳥林間度客遠乏衣裘歲宴饒霜露參差興別緒依遲起離慕

願言如可信行邁亦云反睇景不告勞瞻途寧遽遠何以淹歸轍驚妾事春晚送目亂前華馳心迷舊婉

椒珮容有結振芳跂路隅黃金徒以賦白珪終不渝明

心良自皎安用久跼蹐過車及粉巷流日下西虞  
披帷悵有望出門遲所欲彼美復來儀慙顏變欣矚蘭  
艾隔芳臭涇渭分清濁去去夫人子請殉川之曲

謝朓

入朝曲

江南佳麗地金陵帝王州逶迤帶綠水迢遞起朱樓飛  
甍夾馳道垂楊蔭御溝凝笳翼高蓋疊鼓送華輶獻納  
雲臺表功名良可收



出藩曲

雲枝紫微內分組承明阿飛艚遡極浦旌節去關河  
眇眇蒼山色沉沉寒水波鏡音巴渝曲簫鼓盛唐歌  
夫君邁惟德江漢仰清和

從戎曲

選旅辭轡軒弭節赴河源日起霜戈照風迴連騎翻  
紅塵朝夜合黃沙萬里昏寥戾清笳轉蕭條邊馬煩  
自勉輟耕願征役去何言

送遠曲

北梁辭歡宴南浦送佳人  
方衢控龍馬平路騁朱輪  
瓊筵妙舞絕桂席羽觴陳  
白雲丘陵遠山川時未因  
一為清吹激潺湲傷別巾

登山曲

天明開秀嶠瀾光媚碧堤  
風盪飄鶯亂雲行芳樹低  
暮春春服美遊駕凌丹梯  
升嶠既小魯登巒且悵齊  
王孫尚遊衍蕙草正萋萋

江上曲

易陽春草出踟躕日已暮蓮葉尚田田淇水不可渡願  
子淹桂舟時同千里路千里既相許桂舟復容與江上  
可采菱清歌共南楚

詠邯鄲故才人嫁為廝養卒婦

生平宮閣裏出入侍丹墀開筍方羅縠窺鏡比蛾眉初  
別意未解去久日生悲憔悴不自識嬌羞餘故姿夢中  
時仿佛猶言承燕私

芳樹

早翫華池陰復影滄洲  
柹椅芬芳若斯歲蕤紛可結  
霜下桂枝銷怨與飛蓬折不  
厠玉盤滋誰憐終委絕

臨高臺

千里常思歸登臺臨綺翼  
纔見孤鳥還未辯連山極  
四面動清風朝夜起寒色  
誰知倦遊者嗟此故鄉憶

同謝諮議詠銅爵臺

總帷飄井幹樽酒若平生  
鬱鬱西陵樹詎聞歌吹聲  
芳

襟染淚迹嬋娟空復情玉座猶寂寞況乃妾身輕

遊山

託養因支離乘閒遂疲蹇語默良未尋得喪云誰辯幸  
莅山水都復值清冬緬凌厓必千仞尋谿將萬轉堅崿  
既峻嶒迴流復宛澶杳杳雲竇深淵淵石溜淺傍眺鬱  
簌簌還望森枏梗荒隩被歲莎崩壁帶苔蘚鼯狖呌層  
巘鷗鳬戲沙衍觸賞聊自觀即趣咸已展經目惜所遇  
前路欣方踐無言萱草歇留垣芳可掬尚子時未歸邴

生思自免永志昔所欽勝迹今能選寄言賞心客得性  
良為善

將遊湘水尋句溪

既從陵陽釣挂鱗駮赤螭方尋桂水源謁帝蒼山垂辰  
哉且未曾乘景弄清漪瑟洟瀉長淀潺湲赴兩岐輕蘋  
上靡靡雜石下離離寒草分花映戲鮪乘空移興以暮  
秋月清霜落素枝魚鳥余方玩纓綏君自縻及茲暢懷  
抱山川長若斯

遊東田

戚戚苦無悰攜手共行樂  
尋雲陟累榭隨山望菌閣  
遠樹暖阡阡生煙紛漠漠  
魚戲新荷動鳥散餘花落  
不對芳春酒還望青山郭

暫使下都夜發新林至京邑贈西府同僚

大江流日夜客心悲未央  
徒念關山近終知返路長  
秋河曙耿耿寒渚夜蒼蒼  
引領見京室宮雉正相望  
金波麗鵲玉繩低建章  
驅車鼎門外思見昭丘陽  
馳暉不

可接何況隔兩鄉風雲有鳥路江漢限無梁常恐鷹隼  
擊時菊委嚴霜寄言尉羅者寥廓已高翔

酬王晉安

稍稍枝早勁塗塗露晚晞南中榮橘柚寧知鴻雁飛拂  
霧朝青閣日盱坐彤闈悵望一途阻參差百慮依春草  
秋更綠公子未西歸誰能久京洛緇塵染素衣

郡內高齋閒望答呂法曹

結構何迢遞曠望極高深窗中列遠岫庭際俯喬林日



出衆鳥散山暝孤猿吟已有池上酌復此風中琴非君  
美無度孰為勞寸心惠而能好我問以瑤華音若遺金  
門步見就玉山岑

新亭渚別范零陵雲

洞庭張樂地瀟湘帝子遊雲去蒼梧野水還江漢流停  
驂我悵望輟棹子夷猶廣平聽方籍茂陵將見求心事  
俱已矣江上徒離憂

懷故人

芳洲有杜若可以贈佳期望望忽超遠何由見所思行  
行未千里山川已間之離居方歲月故人不在茲清風  
動簾夜孤月照窗時安得同攜手酌酒賦新詩

之宣城郡出新林浦向板橋

江路西南永歸流東北驚天際識歸舟雲中辨江樹旅  
思倦搖搖孤遊昔已屢既歡懷祿情復協滄洲趣囂塵  
自茲隔賞心於此遇雖無玄豹姿終隱南山霧

休沐重還丹陽道中

薄遊第從告思閒願罷歸還叩歌賦似休汝車騎非灞  
池不可別伊川難重違汀葭稍靡靡江蓂復依依田鵠  
遠相呌沙鵠忽爭飛雲端楚山見林表吳岫微試與征  
徒望鄉淚盡沾衣賴此盈樽酌含景望芳菲問我勞何  
事霑衣仰清徽志狹輕軒冕恩甚戀閨闈歲華春有酒  
初服偃郊扉

京路夜發

擾擾整夜裝肅肅戒徂兩曉星正寥落晨光復瀼瀼猶

沾餘露團稍見朝霞上故鄉邈已覓山川修且廣文奏  
方盈前懷人去心賞敕躬每跼踖瞻恩惟震蕩行矣倦  
路長無由稅歸鞅

晚登三山還望京邑

灞涘望長安河陽視京縣白日麗飛甍參差皆可見餘  
霞散成綺澄江靜如練喧鳥覆春洲雜英滿芳甸去矣  
方滯淫懷哉罷歡宴佳期悵何許淚下如流霰有情知  
望鄉誰能鬢不變

觀朝雨

朔風吹飛雨蕭條江上來既灑百祥觀復集九成臺空  
濛如薄霧散漫似輕埃平明振衣坐重門猶未開耳目  
暫無擾懷古信悠哉戢翼希驤首乘流畏曝鰓動息無  
兼遂岐路多徘徊方同戰勝者去剪北山萊

宣城郡內登望

借問下車日匪直望舒圓寒城一以眺平楚正蒼然山  
積陵陽阻溪流春穀泉威紆距遙甸巉岬帶遠天切切

陰風暮桑柘起寒煙悵望心已極惆悵魂屢遷方棄汝  
南諾言稅遼東田

冬日晚郡事隙

案牘時閒暇偶坐觀卉木颯颯蒲池荷脩脩蔭窗竹簷  
隙自周流房櫳閒且肅蒼翠望寒山崢嶸瞰平陸已惕  
慕歸心復傷千里目風霜旦夕甚蕙草無芬馥云誰美  
笙簧孰是厭邁軸願言稅逸駕臨潭餌秋菊

冬緒羈懷示蕭諮議虞田曹劉江二常侍

欽定四庫全書

不食月言選  
卷六

去國懷丘園入遠滯城闕寒燈耿宵夢清鏡悲曉發風  
草不留霜冰池共如月寂寞此間惟琴尊任所對客念  
坐嬋媛年華稍菴夢夙慕雲澤遊共奉荆臺績一聽春  
鶯喧再視秋虹沒疲驂良易返恩波不可越誰慕臨淄  
鼎常希茂陵渴依隱幸自從求心果蕪昧方軫歸與願  
故山芝未歇

落日悵望

昧旦多紛喧日宴未遑舍落日餘清陰高枕東窗下寒

槐漸如來秋菊行當把借問此何時涼風懷朔馬已傷  
暮歸客復思離居者情嗜幸非多案牘偏為寡既乏瑯  
琊政方憇洛陽社

移病還園示親屬

疲策倦人世斂性就幽蓬停琴佇涼月滅燭聽歸鴻涼  
薰乘暮晰秋華臨夜空葉低知露密崖斷識雲重折荷  
葺寒袂開鏡盼衰容海暮騰清氣河關祕棲沖煙衡時  
未歇芝蘭去相從



治宅

結宇夕陰街荒幽橫九曲迢遞南川陽迤邐西山足闢  
館臨秋風敞窗望寒旭風碎池中荷霜翦江南策旣無  
東都金且稅東臯粟

奉和竟陵王同沈右率過劉先生墓

嘉樹因枝條琢玉良可寶若人陵曲臺垂帷茂淵道善  
誘宗學原鳴鐘霽幽抱仁風徂宛洛清徽夜何早歲晚  
結松陰平原亂秋草不有至言揚終滯西山老

和何議曹郊遊二首

春心澹容與挾弋步中林朝光映紅萼微風吹好音江  
垂得清賞山際果幽尋未嘗遠離別知此愜歸心流汭  
終靡已嗟行方至今

江臯倦遊客薄暮懷歸者揚舲浮大川惆悵至日下  
靡青莎被潺湲石溜瀉寄語持笙簧舒憂願自假歸途  
豈難涉翻同江上夏

和劉西曹望海臺

滄波不可望望極與天平往往孤山映處處春雲生差  
池遠雁沒颿沓羣鳬驚囂塵及簿領棄捨出重城臨川  
徒可羨結網庶時營

新治北窗和何從事

國小暇日多民淳紛務屏闕牖期清曠開簾候風景決  
決日照溪團團雲出巖峩蘭棹峻駢闐石路整池北  
樹如浮竹外山猶影自來彌弦望及君臨箕頽清文蔚  
且詠微言超已領不見城壕側思君朝夕頃迴舟方在

辰何以慰延頸

和王主簿李哲怨情

掖庭聘絕國長門失歡宴相逢詠靡蕪辭寵悲團扇花  
叢亂數蝶風簾入雙燕徒使春帶賒坐惜紅妝變生平  
一顧重宿昔千金賤故人心尚爾故心人不見

和徐都曹出新亭渚

宛洛佳遨遊春色滿皇州結軫青郊路迴瞰蒼江流日  
華川上動風光草際浮桃李成蹊徑桑榆蔭道周東都

已倣載言歸望綠疇

和江丞北戍琅邪城

春城麗白日阿閣跨層樓  
蒼江忽渺渺驅馬復悠悠  
京洛多塵霧淮濟未安流  
豈不思撫劒惜哉無輕舟  
夫君良自勉歲暮勿淹留

奉和隨王殿下四章

高秋夜方靜神居肅且深  
閒階塗廣露涼宇澄月陰  
嬋娟影池竹踈蕪散風林淵  
情協爽節詠言興德音闇道

空已積干直愧蓬心

星回夜未艾洞房凝遠情雲陰滿池榭中月懸高城喬  
木含風霧行雁飛且鳴平臺盛文雅西園富羣英芳慶  
良永矣君王嗣德聲眷此伊洛詠載懷汾水情顧已非  
麗則恭惠奉仁明觀淄詠已失憮然愧簪纓

睿心重離析歧路清江隈四面寒飈舉千里白雲來川  
長別管思地迥翻旗回還顧昭陽闕超遠章華臺置酒  
巫山日為君停玉杯

玄冬寂修夜天圍靜且開  
亭臯霜氣愴松宇清風來  
高琴時以思幽人多感懷  
幸藉汾陽想嶺首正徘徊

和王中丞聞琴

涼風吹月露圓景動清陰  
蕙風入懷抱聞君此夜琴  
蕭瑟滿林聽輕鳴響澗音  
無為澹容與蹉跎江海心

贈王主簿

清吹要碧玉調弦命綠珠  
輕歌急綺帶含笑解羅襦  
餘曲詎幾許高駕且踟躕  
徘徊韶景暮惟有洛城隅

和沈右率諸君餞謝文學

春夜別清樽江潭復為客歎息東流水如何故鄉陌重  
樹日芬蒨芳洲轉如積望望荆臺下歸夢相思夕

離夜

玉繩隱高樹斜漢耿層臺離堂華燭盡別幌清琴哀翻  
潮尚知恨客思眇難裁山川不可盡況乃故人杯

望三湖

積水照蘋霞高臺望歸翼平原周遠近連汀見紆直歲



蕤向春秀芸黃共秋色薄暮傷哉人嬋媛復何極

送江水曹還遠館

高館臨荒途清川帶長陌上有流思人懷舊望歸客塘  
邊草雜紅樹際花猶白日暮有重城何由盡離席

臨溪送別

悵望南浦時徙倚北梁步葉上涼風初日隱輕霞暮荒  
城迴易陰秋溪廣難渡沫泣豈徒然君子行多露

別江水曹

山中上芳月故人清樽賞遠山翠百重迴流映千丈花  
枝聚如雪蕪絲散猶網別後能相思何嗟異封壤

鏡臺

玲瓏類丹檻苔亭似玄闕對鳳懸清冰垂龍挂明月照  
粉拂紅妝插花理雲髮玉顏徒自見常畏君情歇

燈

發翠斜漢裏蓄實宕山峰抽莖類仙掌銜光似燭龍飛  
蛾再三繞輕花四五重孤對相思夕空照舞衣縫

燭

杏梁賓未散桂宮明欲沈暖色輕帷裏低光照寶琴徘徊雲髻影的爍綺疏金恨君秋月夜遺我洞房陰

琴

洞庭風雨幹龍門生死枝雕刻紛布濩冲響鬱清卮春風搖蕙草秋月滿華池是時操別鶴遥遥客淚垂

席

本生潮汐池落景照參差汀洲蔽杜若幽渚奪江蘿遇

君時採擷玉座奉金卮但願羅衣拂無使素塵彌

詠竹火籠

庭雪亂如花井冰粲成玉因炎入貂袖懷溫奉芳褥體  
密用宜通文邪性非曲本自江南墟嫂娟修且綠暫承  
君玉指請謝陽春旭

劉繪

有所思

別離安可再而我更重之佳人不相見明月空在帷共

御滿堂酌獨斂向隅眉中心亂如雪寧知有所思

餞謝文學離夜

汀洲千里芳朝雲萬里色悠然在天隅之子去安極春  
潭無與窺秋臺誰共陟不見一佳人徒望西飛翼

入琵琶峽望積布磯呈玄暉

江山信多美此地最為神以茲峰石麗重在芳樹春照  
爛虹蜺雜交錯錦繡陳差池若燕羽崩方似龍鱗却瞻  
了非向前觀已復新翠微上虧景青莎下拂津巉巖如

刻削可望不可親  
昔途首遐路未獲  
究清塵誓將返初  
服歲暮請為隣

詠博山香爐

參差鬱佳麗合沓紛可憐  
蔽虧千種樹出沒萬重山  
上鏤秦王子駕鶴乘紫煙  
下刻蟠龍勢矯首半銜蓮  
旁為伊水麗芝蓋出巖間  
復有漢游女拾羽弄餘妍  
榮色何雜揉縟繡更相鮮  
麝麝或騰倚林薄香芊眠  
掩華終不發含薰未肯然  
風生玉階樹露湛曲池蓮  
寒蟲悲夜室

秋雲沒曉天

孔稚珪

白馬篇二首

驥子跼且鳴鐵陣與雲平漢家嫖姚將馳突匈奴庭少  
年鬪猛氣怒髮為君征雄戟摩白日長劒斷流星早出  
飛狐塞晚泊樓煩城虜騎四山合胡塵千里驚嘶笳振  
地響吹角沸天聲左碎呼韓陣右破休屠兵橫行絕漠  
表飲馬瀚海清隴樹枯無色沙草不常青勒石燕然道

凱歸長安亭縣官知我健四海誰不傾但使強胡滅何  
須甲第成當今丈夫志獨為上古英

白馬金具裝橫行遼水旁問是誰家子宿衛羽林郎文  
犀六屬鎧寶劍七星光山虛弓響徹地迴角聲長宛河  
推勇氣隴蜀擅威彊輪臺受降虜高闕剪名王射熊入  
飛觀校獵下長楊英名欺衛霍智策蔑平良島夷時失  
禮卉服犯邊疆徵兵離薊北輕騎出漁陽集軍隨日暈挑  
戰逐星芒陣移龍蛇動營開虎翼張衝冠入死地攘臂越



金湯塵飛戟鼓急風交征旆揚轉鬪平華地追奔掃鬼方  
本持身許國况復武功彰會令千載後流譽滿旂常

陸厥

南郡歌

江南可採蓮蓮生荷已大旅雁向南飛浮雲復如蓋望  
美積風露踈麻成襟帶雙珠惑漢臯娥荀迷下蔡玉齒  
徒粲然誰與啓含貝

邯鄲行

趙女擗鳴琴邯鄲紛躑步長袖曳三街兼金輕一顧有  
美獨臨風佳人在遐路相思欲褰袵叢臺日已暮

京兆歌

兔園夾池水修竹復檀欒不如黃山苑儲胥與露寒  
邈迤傍無界岑崟鬱上干上干入翠微下趾連長薄芳露  
浸紫莖秋風搖素萼雁起宵未央雲間月將落照梁桂  
兮影徘徊承露盤兮光照灼壽陵之街走狐兔金卮玉  
盃會銷鑠願奉蒲萄花為君實羽爵

旦發青林

孤征越清江遊子悲路長二旬倏已滿三千眇未央草  
雜今古色巖留冬夏霜寄懷中山舊舉酒莫相忘

丘巨源

詠七寶畫圖扇

妙縞貴東夏巧媛出吳閨裁如白玉壁縫似明月輪  
表裏鏤七寶中銜駭難珍畫作景山樹圖為河洛神  
來延揮握玩入與鑲釧親生風長袖際晞華紅粉津

拂盼迎嬌意，隱映含歌人。  
時移務忘故，節改競存新。  
卷情隨象輦，舒心謝錦茵。  
厭歇何足道，敬哉先後晨。

聽鄰妓

披袵乏遊術，憑軾寡文才。  
蓬門長自寂，虛席視生埃。  
貴里臨倡館，東隣歌吹臺。  
雲間嬌響徹，風末艷聲來。  
飛華瑤翠幄，揚芬金碧杯。  
久絕中州美，從念尸鄉灰。  
遺情悲近世，中山安在哉。

李夫人及貴人歌

屬車桂席塵豹尾香煙滅彤殿向薜蘿青蒲復萎絕坐  
萎絕對薜蘿臨丹階泣椒塗寡鶴羈雌飛且止雕梁翠  
壁網蜘蛛洞房明月夜對此淚如珠

中山王孺子妾歌二首

未央才人中山孺子一笑傾城一顧傾市傾城不自美  
傾市復為容願把陵陽袖披雲望九重

又

如姬寢卧内班婕坐同車洪波陪飲帳林光宴秦餘歲  
暮寒颺及秋水落芙蓉子瑕矯後駕安陵泣前魚賤妾  
終已矣君子定焉如

臨江王節士歌

木葉下江波連秋月照浦雲歛山秋思不可裁復帶秋  
風來秋風來已寒白露輕羅紈節士慷慨髮衝冠彎弓  
挂若水長劍竦雲端

虞炎

餞謝文學離夜

差池燕始飛  
羃歷草初輝  
離人悵東顧  
遊子愴西歸  
清潮已駕渚  
溽露復沾衣  
一乖當春聚  
方掩故園扉

詠簾

青軒明月時  
紫殿秋風日  
矐矐引光輝  
曖曖映容質  
清露依檐垂  
蛸絲當戶密  
褰開誰共臨  
掩晦獨如失

顧歡

臨終詩

五塗無恒宅三清有常舍精氣因天行游魂隨物化鵬  
鷗適大海蜩鳩之桑柘達生任去留善死均日夜委命  
安所乘何方不可駕翹心企前覺融然自此謝

顧則心

望解前水竹

蕭蕭叢竹映澹澹平湖淨葉倒連漪文水漾檀欒影相  
思不會面相望空延頸遠天去浮雲長墟斜落景幽痾  
與歲積賞心隨事屏鄉念一遄迴白髮生俄頃



釋寶月

估客樂

郎作十里行儂作九里送拔儂頭上釵與郎資路用  
有信數寄書無信心相憶莫作瓶落井一去無消息


行路難

君不見孤雁關外發酸嘶度揚越空城客子心腸斷幽  
閨思婦氣欲絕凝霜夜下拂羅衣浮雲中斷開明月夜  
夜遙遙徒相思年年望望情不歇寄我匣中青銅鏡倩

人為君除白髮行路難行路難夜聞南城漢使度使我  
流淚憶長安

蘇小小歌係雜曲

妾乘油壁車郎騎青驄馬何處結同心西陵松柏下



石倉歷代詩選卷六

欽定四庫全書

集部

石倉歷代詩選卷七

詳校官庶吉士臣范逢恩

侍讀臣孫球覆勘

總校官進士臣朱鈐

校對官中書臣嵇承志

謄錄監生臣秦在東

欽定四庫全書

石倉歷代詩選卷七

明 曹學佺 編

梁詩一

武帝

姓蕭氏諱衍字叔達

芳樹

綠樹始搖芳芳生非一葉一葉度春風芳華自相接雜色亂參差衆花紛重疊重疊不可思思此誰能愜

有所思

誰言生離久適意與君別  
衣上芳猶在握裏書未滅腰  
間雙綺帶夢為同心結常恐  
所思露瑤華未忍折

雍臺

日落登雍臺佳人殊未來綺  
窗蓮花掩網戶琉璃開  
昔臨紫桂蔓延交青苔月沒  
光陰盡望子獨悠哉

河中之水歌

河中之水向東流洛陽女兒  
名莫愁莫愁十三能織綺

十四採桑南陌頭十五嫁為盧家婦十六生兒字阿侯  
盧家蘭室桂為梁中有鬱金蘇合香頭上金釵十二行  
足下絲履五文章珊瑚掛鏡爛生光平頭奴子擎履箱  
人生富貴何所望恨不早嫁東家王

東飛伯勞歌

東飛伯勞西飛燕黃姑織女時相見誰家兒女對門居  
開顏發豔照里閭南窓北牖挂明光羅帷綺帳脂粉香  
女兒年幾十五六窈窕無雙顏如玉三春已暮花從風

空留可憐誰與同

答任殿中宗記室王中書別

問我去何節光風正悠悠  
蘭華時未晏舉袂徒離憂  
緩容承別酒鳴琴和好仇  
清宵一已曙藐爾泛長洲  
眷言無歇緒深情附還流

首夏泛天池

薄遊朱明節泛漾天淵池  
舟楫互容與藻蘋相推移  
碧芷紅菡萏白沙青漣漪  
新波拂舊石殘花落故枝  
葉軟



風易出草密路難披

登北顧樓

歇駕止行警迴輿暫游識清道巡丘壑緩步肆登陟雁  
行上差池羊腸轉相逼歷覽窮天步矚矚盡地域南城  
連地險北顧臨水側深潭下無底高岝長不測舊嶼石  
若構新洲花如織

代蘇屬國婦

良人如我期不謂當過時秋風忽送節白露凝前基愴

愴獨涼枕惺惺孤月帷忽聽西北雁似從東海湄果銜  
萬里書中有生離辭惟言長別矣不復道相思胡羊久  
剽奪漢節故支持帛上看未終臉下淚如絲空懷之死  
誓遠勞同穴詩

古意

飛鳥起離離驚散忽差池噉嘈繞樹上翩翩集寒枝既  
悲征役久偏傷壠上兒寄言閨中妾此心詎能知不見  
松蘿上落葉恨不移

擣衣

駕言易水北送別河之陽沈思慘行鑣結夢在空牀既  
寤丹綠謬始知紈素傷中州木葉下邊城應早霜陰蟲  
日慘烈庭草復芸黃金風徂清夜明月懸洞房嫋嫋同  
宮女助我理衣裳參差夕杵引哀怨秋砧揚輕羅飛玉  
腕弱袖低紅妝朱顏日已興盼睇色增光擣以一匪石  
文成雙鴛鴦制握斷金刀薰用如蘭芳佳期久不歸持  
此寄寒鄉妾身誰與容思君苦入腸

織婦

送別出南軒離思沈幽室調梭輟寒夜鳴機罷秋日良  
人在萬里誰與共成匹願得一迴光照此身與疾君情  
尚未忘妾心長自畢

七夕

白露月下團秋風枝上鮮瑤臺含碧露羅幕生紫烟妙  
會非綺節佳期乃涼年玉壺承夜急蘭膏依曉煎昔悲  
漢難越今傷河易旋怨咽雙念斷悽悼兩情懸

邊戍

秋月出中天遠近無偏異共照一光輝各懷離別思

詠舞

脆弱復低舉身輕由迴縱可謂寫自歡方與心期共

昭明太子

諱統字德施  
武帝長子

三婦豔

大婦舞輕巾中婦拂華茵小婦獨無事紅黛潤芳津  
良人且高卧方欲薦梁塵

長相思

相思無終極長夜起嘆息徒見貌嬋娟寧知心有憶寸  
心無以因願附歸飛翼

貽明山賓 令曰明祭酒出撫大藩擁旄推轂  
明金拖紫而恒事屢空聞構宇未成今送薄  
助并貽以詩云

平仲古稱奇夷齊昔擅美令則挺伊賢東秦固多士築  
室非道傍置宅歸仁里庚桑方有係原生今易擬必來

三徑人將招五經士

開善寺法會

栖鳥猶未翔命駕出山莊詰屈登馬嶺迴互入羊腸稍  
看原藹藹漸見岫蒼蒼落星埋遠樹新霧起朝陽陰池  
宿早雁寒風催夜霜茲地信間寂清曠惟道場玉樹疏  
璃水羽帳鬱金牀紫柱珊瑚地神幢明月璫牽蘿下石  
磴攀桂陟松梁澗斜日欲隱煙生樓半藏千祀終何邁  
百代歸我皇神功照不極睿鏡湛無方法輪明暗室慧

海渡慈航塵根久未洗希霑垂露光

同泰僧正講

放光聞驚岳金牒秘香城窮源絕有際離照歸無名若  
人聆至寂寄說表真寔能令梵志遣亦使羣魔驚寶珠  
分水相須彌會色形學徒均染疊遊士譬春英伊子寡  
空智徒深愛怯情舒金起祇苑開筵慕肅成年鍾儵從  
變弦望聚舒盈今聞大林聚淨土接承明掖影連高塔  
法鼓亂嚴更雷聲芳樹長月出地芝生已知法味樂復



悅玄言清何因動飛轡暫使塵勞輕

鍾山解講

清宵出望園詰晨屆鍾嶺輪動文學乘笳鳴賓從靜暇  
出巖隱光月落林餘影糾紛八桂密坡陀再城永伊予  
愛丘壑登高至節景迢遞觀千室迤邐觀萬頃即事已  
如斯重茲遊勝境精理既已詳玄言亦兼逞方知蕙帶  
人囂虛成易屏眺瞻情未終龍鏡忽遊騁非云樂逸遊  
意欲識箕顙

玄圃講

白藏氣已暮玄英序方及稍覺螢聲悽轉聞鳴雁急穿  
池狀浩汗築峰形礫岷軒雲緣宇陰晚景乘軒入風來  
幔影轉霜流樹條濕林際素羽翔漪間潁尾吸試欲遊  
寶山庶攸信根立名利白巾談筆札劉王給茲樂踰笙  
磬寧止消涓邑雖娛慧有三終寡聞知十

晚春

紫蘭初葉滿黃鶯弄始稀石蹲還似獸蘿長更勝衣水

曲文魚聚林暝雅鳥飛渚蒲變新節巖桐長舊園風花  
落未已山齋開夜扉

林下作妓詩

炎光向夕斂徙宴臨前池泉將影相得花與面相宜管  
聲如鳥弄舞袖寫風枝懽樂不知醉千秋長若斯

賦書帙

擢影兔園池抽莖淇水側朝映出嶺雲暮聚飛歸翼幸  
雜綳囊用聊因班女織一合軒義曲千齡如可即

欽定四庫全書

石倉歷代詩選  
卷七

簡文帝

諱綱字世繡  
武帝第三子

上之回

前旆拂回中後車臨桂宮  
輕絲駐雲罕春色繞川風  
桃林方灼灼柳路日瞳瞳  
韶聲駭胡騎清磬聳山戎  
微臣今拜手願帝永無窮

採桑

春色映空來先發院邊梅  
細萍重疊長新花歷亂開  
連珂往淇上接幃至叢臺  
叢臺可憐妾當窗望飛蝶  
忌跌

行衫領熨斗成褫襦下牀著珠珮捉鏡安花鑷薄晚畏  
蠶饑競採春桑葉寄語採桑伴訝今春日短枝高攀不  
及葉細籠難滿年年將使君歷亂遣相聞欲知琴裏意  
還贈錦中文何當照梁日還作入山雲重門皆已閉方  
知留客袂可憐黃金絡複以青絲繫必也為人時誰令  
畏夫婿

從軍行

貳師借善馬樓蘭貪漢財前年出右地今歲討輪臺魚

雲望旗聚龍沙隨陣開冰城朝浴鐵地道夜銜枚將軍  
號令密天子璽書催何時反舊里遙見下機來

泛舟橫大江

滄波白日暉遊子出王畿旁望重山轉前觀遠帆稀廣  
水浮雲吹江風引夜衣旅雁同洲宿寒鳧夾浦飛行客  
誰多病當念早旋歸

豔歌曲

雲楣桂成戶飛棟杏為梁斜牕通葢氣細隙引塵光裁

衣魏后尺汲水淮南牀青驪暮當返預使羅裙香

和人以妾換馬

功名幸多種何事苦生離誰言似白玉定是魏青驪必  
取匣中釧迴作飾金羈真成恨不已願得路傍兒

楚妃歎

幽閨情脉脉漏長宵寂寂草螢飛夜戶絲蟲繞秋壁薄  
笑未為欣微歎還成戚金簪鬢下垂玉筍衣前滴

新成安樂宮

遙看雲霧中刻桷映丹紅珠簾通曉日金華拂夜風欲  
知歌管處來過安樂宮

雙桐生空井

季月雙桐井新枝雜舊株晚葉藏棲鳳朝花拂曙烏還  
看西子照銀牀繫轡轡

烏棲曲

浮雲似帳月如鉤那能夜夜南陌頭宜城投泊今行熟  
停鞍繫馬暫棲宿



青牛丹轂七香車可憐今夜宿倡家  
倡家高樹烏欲棲羅帷翠帳向君低

織成屏風金屈膝朱脣玉面燈前出  
相看氣息望君憐誰能含羞不自前

隴西行

邊秋胡馬肥雲中驚寇入勇氣特無侶  
輕兵救邊急沙平不見虜嶂嶮還相及  
出塞豈成歌經川未遑汲烏孫塗更阻  
康居路猶澁月暈抱龍城星流照馬邑  
長安路

遠書不還寧知征人獨佇立

侍遊新亭應令

神襟愍行邁岐路愴徘徊遙瞻十里陌  
傍望九城臺鳳管流虛谷龍騎藉春  
芳曉光浮野映朝煙承日迴沙文浪  
中積春陰江上來柳葉帶風轉桃花  
含雨開聖情蘊珠綺札命表英才顧  
憐硤硤質何以儷瓊瑤

登城

日影半東簷靖念空杼柚小堂倦縹  
書華池厭脩竹寂

冥既寡悰登城望原陸遙山半吐雲嚴颺時響谷靡靡  
見虛煙森森視寒木落霞乍續斷晚浪時迴復遠矚既  
濡翰徒自勞心目短歌雖可裁緣情非霧縠

經琵琶峽

由來歷山川此地獨迴遭百嶺相紆蔽千崖共隱天橫  
峰時礙水斷岼或通川還瞻已迷向直去復疑前夕波  
照孤月山枝斂夜烟此時愁緒密一夕魂九遷

旦出興業寺講詩

沐芳肅朝帶駕言抵淨宮羽旗承去影鏡吹雜還風吳  
戈夏服箭驥馬綠沈弓水照柳初碧烟含桃半紅由來  
六塵縛宿昔五纏蒙見鶴徒知謬察象理難同方知慙  
四辯奚用語三空

率爾成詠

借問仙將畫詎有此佳人傾城且傾國如雨復如神漢  
后憐名燕周王重姓申挾瑟曾遊趙吹簫屢入秦玉階  
遍望樹長廊每逐春約黃出意巧纏絃用法新迎風時

引袖避日暫披巾疎花映髻插細佩遶衫身誰知日欲  
薄含羞不自陳

詠內人晝眠

北窗聊就枕南簷日未斜攀鉤落綺障插淚舉琵琶夢  
笑開嬌靨眠鬟厭落花簾文生玉腕香汗浸紅紗夫婿  
恒相伴莫誤是倡家

守東華門開

脂車向馳道總轡息中華落關猶待漏交戟未通車薄

雲初落雨曙色始成霞  
塹流鋪紫若城風泛橘花  
絃誦終無取顧已自懷嗟

詠美人觀畫

殿上圖神女宮裏出佳人  
可憐俱是畫誰能辯偽真  
分明淨眉眼一種細腰身  
所可特為異長有好精神

美人晨妝

北窗向朝鏡錦帳復斜縈  
嬌羞不肯出猶言妝未成  
散黛隨眉廣顰脂逐臉生  
試將持出衆定得可憐名

七夕

秋期此時浹長夜徙河靈紫烟凌鳳羽紅光隨玉輶洛陽疑劒氣成都怪客星天梭織來久方逢今夜停

詠鏡

四銖恒在側誰言覽鏡稀如冰不見水似扇長含輝全開玳瑁匣併卷織成衣脫入相如手疑言趙璧歸

詠晚閨

珠簾向暮下妖姿不可追花風暗裏覺蘭燭帳中飛何

時玉窗裏夜夜更縫衣

曉思

晨禽爭學嘯朝花亂欲開  
爐烟入斗帳屏風隱鏡臺  
紅妝幾盡淚蕩子何當來

愁閨照鏡

別來顚顚久他人怪容色  
只有匣中鏡還持自相識  
夜遣內人還後舟

錦幔扶船列蘭橈拂浪浮  
去燭猶文水餘香尚滿舟



春情

蝶黃花紫燕相追楊低柳合露塵飛已見垂鈎挂綠樹  
誠知淇水沾羅衣兩童夾車問不已五馬城南猶未歸  
鶯啼春欲駛無為空掩扉

元帝

諱繹字世誠  
武帝第七子

巫山高

巫山高不窮迴出荆門中灘聲下濺石猿鳴上逐風樹  
雜山如畫林暗澗疑空無因謝神女一為出房櫳

隴頭水

銜悲別隴頭關路漫悠悠故鄉迷遠近征人分去留沙  
飛曉成幕海氣旦如樓欲識秦川處隴水向東流

關山月

朝望清波道夜上白登臺月中含桂樹流影自徘徊寒  
沙逐風起春花犯雪開夜長無與晤衣單誰為裁

燕歌行

燕趙佳人本自多遼東少婦學春歌黃龍戍北花如錦

玄菟城前月似蛾如何此時別夫婿金羈翠眊往交河  
還聞入漢去燕營怨妾愁心百恨生漫漫悠悠天未曉  
遙遙夜夜聽寒更自從異縣同心別偏恨同時成異節  
橫波滿臉萬行啼翠眉暫臉千重結竝海連天合不開  
那堪春日春臺乍見遠舟如落葉復看遙舸似行杯  
沙汀夜鶴嘯羈雌妾心無趣坐傷離翻嗟漢使音塵斷  
空傷賤妾燕南陲

赴荊州泊三江口

涉江望行旅金鉦間綵旂水際含天色虹光入浪浮柳  
條恒拂岼花氣盡薰舟叢林多故社單戍有危樓疊鼓  
隨朱鷺長簫應紫騮蓮舟夾羽檠畫舸覆緹油榜歌殊  
未息於此泛安流

和王僧辯從軍

寶劒飾龍淵長虹畫彩旂山虛和鏡管水淨寫樓船連  
鷄隨火度燧象帶烽然洞庭晚風急瀟湘夜月圓荀令  
多文藻臨戎賦雅篇

秋夜

秋夜九重空  
蕩子怨房櫳  
燈光入綺帷  
簾影穿屏風  
金徽調玉軫  
茲夜撫離鴻

寒閨

烏鵲夜南飛  
良人行未歸  
池水浮明月  
寒風送擣衣  
願織迴文錦  
因君寄武威

沈約

字休文吳興武康人

昭君辭

朝發披香殿夕濟汾陰河於茲懷九逝自此斂雙蛾沾  
妝疑湛露繞臆狀流波日見奔沙起稍覺轉蓬多胡風  
犯肌骨非直傷綺羅銜涕試南望關山鬱嵯峨始作陽  
春曲終成苦寒歌惟有三五夜明月暫經過

長歌行

連連舟壑改微微市朝變來功嗣往迹莫武祖升彥局  
塗頓遠策留懽恨奔箭拊臆狀驚瀾循休擬回電歲去  
芳願違年來苦心薦春貌既移紅秋林豈停猜一倍茂

陵道寧思栢梁宴長戢兔園情永別金華殿聲微無惑  
簡丹青有餘絢幽籥且未調無使長歌倦

從軍行

惜哉征夫子憂恨良獨多浮天出鯁海東馬渡交河雪  
縈九折燈風卷萬里波維舟無夕島秣驥乏平莎凌濤  
富驚沫援木闕垂蘿江颼鳴疊嶼流雲照層阿玄埃晦  
朔馬白日照吳戈寢興動征怨寤寐起還歌晨裝豈輟  
警夕壘詎淹和苦哉遠征人悲矣將如何

白馬篇

白馬紫金鞍停鑣過上蘭寄言狹斜子詎知隴道難赤  
坂途三折龍堆路九盤冰生肌裏冷風起骨中寒功名  
志所急日暮不遑餐長驅入石地輕舉出樓蘭直去已  
垂涕寧可望長安匪期定遠封無羨輕車官惟見恩義  
重豈覺衣裳單本持軀命答幸遇身名完

夜夜曲

河漢縱且橫北斗橫復直星漢空如此寧知心有憶孤



燈暖不明寒機曉猶織零淚向誰道鷄鳴徒嘆息

三日侍林光殿曲水宴應制

宴鎬鏘玉鑾遊汾舉仙輶榮光泛彩旄修風動芝蓋淑  
氣婉登晨天行舘雲旆帳殿臨春籥帷宮繞芳薈漸席  
周羽觴分墀引迴瀨穆穆玄化升濟濟皇階泰將御遺  
風軫遠侍瑤臺會

遊鍾山詩應西陽王教五首

靈山紀地德地險資嶽靈終南表秦觀少室邇王城翠

鳳翔淮海衿帶遶神垌北阜何其峻林薄杳葱青

發地多奇嶺干雲非一狀合沓共隱天參差互相望鬱  
律構丹巘峻增起青嶂勢隨九疑高氣與三山壯

即事既多美臨眺殊復奇南瞻儲胥觀西望昆明池山  
中咸可悅賞逐四時移春光發隴首秋風生桂枝

多值息心侶結架山之足八解鳴澗流四禪隱巖曲窈  
冥終不見蕭條無可欲所願從之遊寸心於此足

君王挺逸趣羽旆臨崇基白雲隨玉趾青霞雜桂旗淹

留訪五藥顧步佇三芝於焉仰鑣駕歲暮以為期

劉真人東山還

連峰竟無已積翠遠微微寥戾野風急芸黃秋草腓我  
來歲云暮於此悵懷歸霜雪方共下寧止露霑衣待余  
兩岐秀去去掩柴扉

新安江至清淺深見底貽京邑遊好

眷言訪舟客茲川信可珍洞徹隨清淺皎鏡無冬春千  
仞寫喬樹百丈見遊鱗滄浪有時濁清濟涸無津豈若

乘斯去俯映石磷磷紛吾隔囂滓寧假濯衣巾願以潺  
湲水霑君纓上塵

送別友人

君東我亦西銜悲涕如霰浮雲一南北何由展言宴方  
作異鄉人贈子同心扇遙裔發海鴻連翻出簷燕春秋  
更去來參差不相見

早發定山

風齡愛遠壑晚莅見奇山標峰綵虹外置嶺白雲間傾

壁忽斜豎絕頂復孤圓歸海流漫漫出浦水濺濺野棠  
開未落山櫻發欲然忘歸屬蘭杜懷祿寄芳荃眷言採  
三秀徘徊望九仙

和竟陵王遊仙詩二首

天矯乘絳仙螭衣方陸離玉鑾隱雲霧溶溶紛上馳瑤  
臺風不息赤水正漣漪崢嶸玄圃上聊攀瓊樹枝

朝止閭闔宮暮宴清都闕騰蓋隱奔星低鑾避行月九  
疑紛相從虹旌乍升沒青鳥去復還高唐雲不歇若華

有餘照淹留且晞髮

華陽先生登樓不復下贈呈

側聞上士說尺木乃騰霄雲駢不展地仙居多麗譙卧  
待三芝秀坐對百神朝銜書必青鳥佳客信龍鑣非止  
靈桃實方見大椿凋

赤松澗

松子排煙去英靈眇難測惟有清澗流潺湲終不息神  
丹在茲化雲輶於此陟願受金液方片言生羽翼渴就

華池飲饑向朝霞食何時當來還延佇青巖側

古意

挾瑟叢臺下徙倚愛容光佇立日已暮戚戚苦人腸露  
葵已堪摘淇水未沾裳錦衾無獨暖羅衣空自香明月  
雖外照寧知心內傷

直學省愁卧

秋風吹廣陌蕭瑟入南闌愁人掩軒卧高牕時動扉虛  
館清陰滿神宇曖微微網蟲垂戶織夕鳥傍欄飛纓珮

空為忝江海事多違  
山中有桂樹歲暮可言歸

宿東園

陳王鬪雞道安仁採樵路東郊  
豈異昔聊可間余步野徑既盤紆  
荒阡亦交附槿籬疎復密荆扉新  
且故樹頂鳴風颭草根積霜露驚  
磨去不息征鳥時相顧茅棟嘯愁  
鴟平岡走寒兔夕陰帶層阜長烟  
引輕素飛光忽我道豈止歲云暮  
若蒙西山藥顏齡倘能度

三月三日率爾成章



麗日屬元巳年芳具在斯開花已匝樹流嚶復滿枝洛陽繁華子長安輕薄兒東出千金堰西臨雁鶩陂遊絲應空轉高楊拂地垂綠幘文照耀紫燕光陸離清晨戲伊水薄暮宿蘭池象筵鳴寶瑟金瓶泛羽卮寧憶春蠶起日暮桑欲萎長袂屢已拂彫胡方自炊愛而不可見宿昔減容儀且當忘情去嘆息獨何為

織女贈牽牛

紅妝與明鏡二物本相親用持施點畫不照離居人往

秋雖一照一照復還塵塵生不復拂蓬首對河津冬夜  
寒如此寧遽道陽春初商忽云至暫得奉衣巾施衿已  
成故每聚忽如新

應王中丞思遠咏月

月華臨靜夜靜滅氛埃方暉竟戶入圓影隙中來高  
樓切思婦西園遊上才網軒映珠綴應門照綠苔洞房  
殊未曉清光信悠哉

詠雪應令

思鳥聚寒蘆蒼雲軫暮色夜雪合且離曉風驚復息嬋  
娟入綺窻徘徊驚情極弱桂不勝枝輕飛屢低翼玉山  
聊可望瑤池豈難即

泛永康江

長枝萌紫葉清源泛綠苔山光浮水至春色犯寒來臨  
晚信永矣望美曖悠哉寄言幽閨妾羅袖勿空裁

餞謝文學離夜

漢池水如帶巫山雲似蓋滯汨背吳潮潺湲橫楚瀨一

望沮漳水寧思江海會以我徑寸心從君千里外

別范安成

生平少年日分手易前期及爾同衰暮非復別離時勿  
言一樽酒明日難重持夢中不識路何以慰相思

初春

夾道覓陽春相將共攜手草色猶自腓林中都未有無  
事逐梅花空教信楊柳且復共歸來含情寄杯酒

春思

楊柳亂如絲綺羅不自持  
春草黃復綠客心傷此時青  
苔已結洧碧水復盈淇  
日華照趙瑟風色動燕姬襟  
前萬行淚故是一相思

傷春

弱草半抽黃輕條未全綠  
年芳被禁籞烟花繞層曲  
寒苔倦復舒冬泉斷方續  
早花散凝金初露泣成玉

領邊繡

纖手製新奇刺作可憐儀  
紫絲應鳳子結縷坐花兒不

聲如動吹無風自裊枝麗色儻未歇聊承雲鬢垂

脚下履

丹墀上颯沓玉殿下趨鏘逆轉珠珮響先表繡袿香裾  
開臨舞席袖拂繞歌堂所嘆忘懷妾見委入羅牀

詠新荷應詔

勿言草卉賤幸宅天池中微根纔出浪短幹未搖風寧  
知寸心裏蓄蓄紫復含紅

六憶詩四首

憶來時灼灼上堦墀  
勤勤叙別離  
慊慊道相思  
相看常不足  
相見乃忘饑

憶坐時點點羅帳前  
或歌四五曲  
或弄兩三弦  
笑時應無比  
嗔時更可憐

憶食時臨盤動容色  
欲坐復羞坐  
欲食復羞食  
含哺如不饑  
擎甌似無力

憶眠時人眠彊未眠  
解羅不待勸  
就枕更須牽  
復恐傍人見  
嬌羞在燭前

八詠詩

登臺望秋月

望秋月秋月光如練照曜三爵臺徘徊九華殿九華珎  
瑁梁華椽與璧璫以茲雕麗色持照明月光凝華入黼  
帳清輝懸洞房先過飛燕戶却映班姬牀桂宮裊裊落  
桂枝早寒淒淒凝白露上林晚葉颯颯鳴雁門早鴻離  
離度湛秀質兮似規委清光兮如素照愁軒之蓬髮影  
金堦之輕步居人臨此笑以歌別客對之傷且慕經衰



圃映寒叢凝清夜帶秋風隨庭雪以偕素與池荷而共  
紅臨玉階之皎皎含霜靄之濛濛轡天衢而徒度轢長  
漢而飛空隱巖崖而半出隔帷幌而纔通散朱庭之奕  
奕入青瑣而玲瓏寒階悲寡鶴沙洲怨別鴻文姬泣胡  
殿昭君思漢宮余亦何為者淹留此山東

會圃臨春風

臨春風春風起春樹遊絲暖如網落花零似霧先泛天  
淵池還過細柳枝蝶逢飛搖颺燕值羽差池揚桂旆動

芝蓋開燕裾吹趙帶趙帶飛參差燕裾合且離迴簪復  
轉黛顧步惜容儀容儀已灼灼春風復迴薄氤氲桃李  
花青跗含素萼既為風所開復為風所落搖綠蒂抗紫  
莖舞春雪雜流鶯曲房開兮金鋪響金鋪響兮妾思驚  
梧臺未陰淇川始碧迎行雨於高唐送歸鴻於碣石經  
洞房響紉素感幽閨思帷帟想芳園兮可以游念蘭翹  
兮漸堪摘拂明鏡之冬塵解羅衣之秋襞既鏗鏘以動  
佩又綢繆而流射始搖蕩以入閨終徘徊而緣隙鳴珠簾

於綉戶散芳塵於綺席是時悵思歸安能久行役佳人  
不在茲春風誰為惜

歲暮愍衰草

愍衰草衰草無容色憔悴荒徑中寒荻不可識昔時兮  
春日昔日兮春風銜花兮佩實垂綠兮散紅氛氤鴉鵲  
右照曜望仙東送歸顧慕泣淇水嘉客淹留懷上宮巖  
陬兮海岸冰多兮霰積爛漫兮崖根攢幽兮簾隙布綿  
密於寒臯吐纖疎於危石既惆悵於君子倍傷心於行

役露縞枝於初旦霜紅天於始夕彫芳卉之九衢賈靈  
茅之三脊風急峭道難秋至客衣單既傷簷下菊復悲  
池上蘭飄落逐風盡方知歲早寒流螢暗明燭雁聲斷  
纔續委絕長信宮蕪穢丹墀曲霜奪莖上紫風銷葉中  
綠山變兮青薇水折兮黃葦秋鴻兮疎引寒鳥兮聚飛  
徑荒寒草合桐長舊巖圍園庭漸蕪沒霜露日霑衣願  
逐晨征鳥薄暮共西歸

霜來悲落桐

悲落桐落桐早霜露燕至葉未抽鴻來枝已素本出龍  
門山長枝仰刺天上峰百丈絕下趾萬尋懸幽根未蟠  
結孤株復危絕初日照光景終年負霜雪自顧無羽儀  
不願生曲池芬芳本自乏華實無所施公子獨留盼王  
孫少見知分取孤生枿徙置北堂陲宿莖抽晚幹新葉  
生故枝故枝雖遼遠新葉頗離離春風一朝至榮華坐  
如斯自惟良菲薄君恩徒照灼顧已非嘉樹空用憑阿  
閣願作清廟琴為君舞玄鶴薜荔可為裳文杏堪作梁

勿言草木賤徒照君末光末光不徒照為君含噉咷陽  
柯淥水絃陰枝苦寒調厚德非所任敢不虛其心若逢  
陽春至吐綠照清潯

夕行聞夜鶴

聞夜鶴夜鶴叫南池對此孤明月臨風振羽儀伊吾人  
之菲薄無賦命之天爵抱跼促之短懷隨冬春而哀樂  
愍海上之驚鳬傷雲間之離鶴離鶴昔未離迴發天北  
垂忽遇疾風起暫下昆明池復畏冬冰合水宿非所宜

欲棲不可往欲去飛已疲勢逐疾風舉求溫向衡楚復  
值南飛鴻參差共成侶海上多雲霧蒼茫失洲嶼自此  
別故羣獨向瀟湘渚故羣不離散相依江海畔夜止羽  
相切晝飛影相亂刷羽共浮沈湛澹泛清潯既不經離  
別安知慕侶心九冬負霜雪六翮飛不任且養凌雲翅  
俛仰弄清音所望浮丘子旦夕來相尋

晨征聽曉鴻

聽曉鴻曉鴻度將旦跨弱水之微瀾發成山之遠岬林

春歸之未幾傷此歲之云半出海漲之蒼茫入雲途之  
瀰漫無東西之可辨孰遐邇之能算微昔見於洲渚赴  
秋期於江漢集勁風於弱軀負重雪於輕翰寒溪可以  
飲荒臯可以竄溪水徒自清微容豈足玩秋蓬飛兮未  
極塞草寒兮無色吳山高兮高難度越水深兮深不可  
測羨明月之馳光顧征禽之駛翼伊余馬之屢懷知君  
行之未極夜綿綿而難曉愁參差而盈臆望山川而無  
似唯星河猶可識孤雁夜南飛客淚但沾衣春鴻旦暮



返客子方未歸歲去歡娛盡年來容貌衰攬衽形雖是  
撫臆事多違青綯雖長復易解白雲誠遠詎難依

解佩去朝市

去朝市朝市深歸暮辭北纓而南徂浮東川而西顧逢  
天地之降祥值日月之重光伊吾行之未已非余情之  
信芳克待詔於金馬奉高宴於栢梁觀鬪獸於虎圈望  
窈窕於披香游西園兮登銅雀攀青璫兮眺重陽講金  
華兮議宣室晝武帳兮夕文昌佩甘泉兮屣五柞簪粉

指兮黻承光託後車兮侍華幄游渤海兮泛清漳天道  
有盈虧寒暑遞炎涼一朝賣玉碗眷眷惜餘香曲池無  
復處桂枝亦銷亡清廟徒肅肅西陵久茫茫薄暮余多  
幸嘉運重來昌忝稽郡之南尉典千里之光貴別北邙  
於濁河戀橫橋於清渭望前軒之早桐對南階之初卉  
惟余情之屢傷豈茲焉之能慰眷昔日兮懷哉歲將暮  
兮歸去來

被褐守山東

守山東山東萬嶺鬱青葱兩溪共一瀉水潔望如空岬  
側青莎被巖間丹桂叢上瞻既隱軫下睇亦溟濛遠林  
響咆獸近樹聒鳴蟲路出若溪右澗吐金華東萬仞倒  
危石百丈注懸淙掣曳瀉流電奔飛似白虹洞井含清  
氣漏穴吐飛風玉竇膏滴瀝石乳室空籠峭崿塗彌險  
巖岨步纔通余捨平生之所愛歛暮年之此逢欲一去  
而不還悵鄒衣之未褫揖林壑之清曠事氓俗之紛詭  
幸帝德之方升值天綱之未毀既除舊而就新故化民

而俗徒播趙俗以南徂扇齊風以東靡乳雉方可馴流  
蝗庶能弭清心矯世濁儉政救民侈秩滿撫白雲淹留  
事芝髓

江淹

字文通濟陽考城人

從冠軍行建平王登廬山香爐峰

廣成愛神鼎淮南好丹經此山具鸞鶴往來盡仙靈瑤  
草正翕艷玉樹信蔥青絳氣下縈薄白雲上杳冥中  
坐瞰蜿蜒俛伏視流星不尋遐怪極則知耳目驚日落長

沙渚曾陰萬里生  
藉蘭素多意臨風默含情  
方學松柏  
隱羞逐市井  
名幸承光誦  
未伏思託後  
旂

望荆山

奉義至江漢  
始知楚塞長  
南關繞桐栢  
西嶽出魯陽  
寒郊無留影  
秋日懸清光  
悲風撓重林  
雲霞肅川漲  
歲晏君如何  
零淚霑衣裳  
玉柱空掩露  
金樽坐含霜  
一聞苦寒奏  
再使艷歌傷

步桐臺

客子畏霜雪憂至竟悠哉綺帷生網羅寶刀積塵埃思  
君出漠北鞍馬登楚臺歲綵合雲光平原秋色來寂聽  
積空意凝望信長懷蕙芬自有美光景詎徘徊山中忽  
緩駕暮雪將盈階

渡西塞望江上諸山

南國多異山雜樹共冬榮潺湲夕澗急嘈嘈晨鷗鳴石  
林上參錯流沫下縱橫松氣鑑青藹霞光鑠丹英望古  
一凝思留滯桂枝情結友愛遠岳採藥好長生當畏佳

人晚秋蘭傷紫萼海外果可學歲暮誦仙經

遊黃蘗山

長望竟何極閩雲連越邊南州饒竒怪赤縣多靈仙金  
峰各虧日銅石共臨天陽岫照鸞采陰谿噴龍泉殘杭  
千代木廬翠萬古烟禽鳴丹壁上猿嘯青崖間秦皇慕  
隱淪漢武願長年皆負雄豪威棄劍為名山况我葵藿  
志松木橫眼前所若同遠好臨風載悠然

無錫縣歷山集

愁生白露日思起秋風年竊悲杜蘅暮擘涕弔空山落  
葉下楚水別鶴噪吳田風氣陰不極日色半虧天酒至  
情蕭瑟憑樽還惘然一聞清琴奏歔泣方留連况乃客  
子念直置絲竹間

外兵舅夜集

丹林一葉舊碧草從此空烟花拂夜色華舟盪秋風斂  
意悵何已極望情思中瑤瀾寂以晏若采能幾終暮心  
亦誰寄江臯桂有叢



古離別

遠與君別者乃至雁門關黃雲蔽千里遊子何時還送  
君如昨日簷前露已團不惜蕙草晚所悲道里寒君在  
天一涯妾身長別離願一見顏色不異瓊樹枝免絲及  
水萍所寄終不移

李都尉陵從軍

樽酒送征人踟躕在親宴日暮浮雲滋握手淚如霰悠  
悠清水川嘉魴得所薦而我在萬里結友不相見袖中

有短書願寄雙飛燕

班婕妤詠扇

紈扇如團月出自機中素畫作秦王女乘鸞向烟霧彩  
色世所重雖新不代故竊愁涼風至吹我玉階樹君子  
思未畢零落在中路

張司空華離情

秋月映簾櫳懸光入丹墀佳人撫鳴琴清夜守空帷蘭  
徑少行迹玉臺生網絲庭樹發紅彩閨草含碧滋延佇

整紱綺萬里贈所思願垂湛露惠信我故日期

謝僕射混遊覽

信矣勞物化憂襟未能整薄言遵郊衢總轡出臺省淒  
淒節序高寥寥心悟永時菊耀巖阿雲霞冠秋嶺蒼然  
惜良辰徘徊踐落景卷舒雖萬緒動復歸有靜曾是迫  
桑榆歲暮從所秉丹壑不可攀亡歸寄匠郢

陶徵君潛田居

種苗在東臯苗生湍阡陌雖有荷鋤倦濁酒聊自適日

暮巾柴車路闇光已夕歸人望烟火稚子候簷隙問君  
亦何為百年會有役但願桑麻成蠶月得妨績素心正  
如此開徑望三益

謝光祿莊郊遊

肅飭出郊際徒樂逗江陰翠山方藹藹青浦正沈沈涼  
葉照沙嶼秋榮冒水潯風散松架險雲鬱石道深靜默  
鏡繇野四睇亂層岑氣清知雁引露華識猿音雲裝信  
解散烟駕可辭金始整丹泉術終覲紫芳心行光自容

齋無使弱思侵

休上人怨別

西北秋風至楚客心悠哉日暮碧雲合佳人殊未來露  
彩方泛艷月華始徘徊寶書為君掩瑤瑟詎能開相思  
巫山渚悵望陽雲臺膏鑪絕沈燎綺席生浮埃桂水日  
千里因之平生懷

學魏文帝

西北有浮雲繚繞華陰山惜哉時不遇入夜值霜寒秋

風聒地起吹我至幽燕幽燕非我國窈窕為誰賢少年  
歌且止歌聲斷客子

悼室人五首

佳人永暮矣隱憂遂歷茲寶燭夜無華金鏡晝恒微桐  
葉生綠水霧天流碧滋蕙弱芳未空蘭深鳥思時湘醺  
徒有酌意塞不能持

適見葉蕭條已復花罨鬱帳裏春風盪簷前還燕拂垂  
涕視去景摧心向徂物今悲輒流涕昔歡常飄忽幽情

一不弭守嘆誰能慰

秋至擣羅紈淚滿未能開  
風光肅入戶月華為誰來  
結眉向珠網瀝思視青苔  
鬢局將成葆帶減不須摧  
我心若涵烟益益滿中懷

窻塵歲時阻閨蕪日夜深  
流黃夕不織寧聞梭杼音  
涼靄漂虛座清香盪空琴  
蜻引知寂寥蛾飛測幽陰  
乃抱生死悼豈伊離別心

二妃麗瀟湘一有乍一無  
佳人承雲氣無下此幽都  
當

追帝女迹出入泛靈輿掩映金淵側遊豫碧山隅曖然  
時將罷臨風返故居

范雲

字彥龍南鄉舞陰人

有所思

如何有所思而無相見時宿昔夢顏色階庭尋履綦高  
張更何已引滿終自持欲知憂能老爲視鏡中絲

貽何秀才

桂葉竟穿荷蒲心爭出波有鷺鷥蘋芰綿蠻弄藤蘿臨



花空相望對酒不能歌  
聞君饒綺思  
擣拔足為多  
布鼓誠自鄙  
何事絕經過

送沈記室夜別

桂水澄夜氛  
楚山清曉雲  
秋風兩鄉怨  
秋月千里寒  
枝寧共採霜  
猿行獨聞捫  
蘿正憶我  
折桂方思君

丘遲

字希範  
烏程人


侍宴樂遊苑送張徐州應詔詩

詰旦閭闔開  
馳道聞鳳吹  
輕莢承玉輦  
細草藉龍騎  
風

遲山尚響雨息雲猶清巢空初鳥飛荇亂新魚戲實為  
北門重匪親孰為寄參差別念舉肅穆恩波被小臣信  
多幸投生豈酬義

早發漁浦潭

漁潭霧未開赤亭風已颺櫂歌發中流鳴鞞響沓嶂村  
童忽相聚野老時一望詭怪石異象嶄絕峰殊狀森森  
荒樹齊析析寒沙漲藤垂島易陟崖傾嶼難傍信是永  
幽棲豈徒暫清曠坐嘯昔有委卧治今可尚



欽定四庫全書

石倉歷代詩選  
卷七

四十一

石倉歷代詩選卷七